

TXOJ CAI OB

Txoj Cai Ob, zaj 1 thiab 4

Lub sij hawm thiab qhov chaw Mais

Xes ntaus cov His Xas Lais.

1 : 1 - 5.

1 1 Cov lus no yog Mais Xes cov lus uas nws hais rau tsoom His Xas Lais huv tib si, thaum lawv nyob sab dej Yos Las Das tim ub, hauv teb chaws suab puam, ntawm As Las Npas, ncaj rau Xus, yog nruab nrab ntawm Pas Laas thiab Tos Fes, Las Npaas, Has Xes Los thiab Dis Zas Has. 2 Txij lub roob Hos Les txog lub roob Xes Is, mus rau Kos Des Npas Nes, muaj kaum ib hnub ke. 3 Yog xyoo plaub caug, lub kaum ib hlis xiab ib, mas Mais Xes hais cov lus no rau cov His Xas Lais, raws li HUAB TAIS kom nws qhia lawv ua lawv lub neej. 4 Mais Xes ntaus rog yeej Xis Hoos, uas yog tus vaj As Mos, nyob lub nroog Hes Saws Npoos. Mais Xes tseem ntaus yeej tus vaj Os, uas yog tus vaj kav Npas Saas, nyob ob lub nroog As Tas Los thiab Es Nres Is. 5 Mais Xes pib tshaj txoj cai lij choj no nyob sab ntug dej Yos Las Das tim ub, hauv cov Muas lub teb chaws.

Txhob ntxiv dab tsyi rau Tswv Ntuj cov lus qhia. 4 : 1 - 2 + 6 - 8.

4 1 "Cov His Xas Lais, zaum no nej mloog txoj cai lij choj, thiab tej kab lis kev cai uas kuv qhia nej hnub no, kom nej coj raws nraim txoj cai ntawd. Ces nej yuav muaj txoj sia, thiab nej yuav tau mus nyob hauv lub teb chaws uas nej cov yawg koob tus HUAB TAIS Tswv Ntuj muab rau nej nyob, kom nej tau txais los ua nej tug. 2 Nej yuav tsis txhob ntxiv ib lo lus rau qhov kuv qhia nej ua, tsis txhob tso ib lo lus pov tseg. Nej yuav khaws

nej tus HUAB TAIS Tswv Ntuj cov lus qhuab qhia raws nraim li kuv ceeb toom rau nej.

6 Nej yuav mloog, yuav coj raws nraim cov lus qhia ntawd, nej thiaj yuav ua neeg thoob tsib, ua neeg ntse nyob ntawm cov pej kum neeg xub ntiag. Thaum lawv hnov hais txog txoj cai no, lawv yuav tsa suab hlo hais tias : Tsuas muaj ib haiv neeg xwb thiaj thoob tsib thiab ntse, yog haiv neeg loj ntawd !"

7 Haiv neeg twg thiaj muaj ib tug Huab Tais nyob ze lawv li peb tus HUAB TAIS Tswv Ntuj nyob ze peb niaj zaus peb hu txog nws ? 8 Haiv neeg twg thiaj muaj ib txog cai lij choj thiab ib co kab lis kev cai ncaj npaum li Txoj Cai uas kuv muab cev rau nej hnub no ?"

His Xas Lais txoj hmoov zoo.

4 : 32 - 40.

32 "Nej sim nug tej laus saib, txij hnub Tswv Ntuj tsim neeg los nyob ntiaj teb, los txog hnub no, txij qab ntug mus txog hauv ntuj, puas muaj ib lo lus muaj hwj chim npaum li Tswv Ntuj lo lus ? Puas muaj neeg tau hnov dua ib lo lus zoo li ntawd ? 33 Puas muaj lwm haiv neeg tau hnov tus Tswv Ntuj muaj txoj sia lub suab hais lus hauv hluav taws tuaj li nej tau hnov tas, thiab lawv tseem muaj txoj sia nyob ntxiv ? 34 Puas muaj lwm tus Tswv Ntuj uas tuaj xaiv ib haiv neeg hauv lwm cov haiv neeg los ua nws tug ? Puas muaj lwm tus Tswv Ntuj tau ua tej yam los sim neeg siab, tej lub cim loj thiab tej yam txaus qhuas, tau sawv ntaus tej tsam rog, tau siv nws txhais tes muaj hwj huam thiab xyab nws txhais npab muaj zog, tau siv nws lub peev xwm ua tej yam txaus

ntshai kawg, xws li nej tus HUAB TAIS Tswv Ntuj tau ua pab nej nyob Hais Nkws Tos teb, rau nej qhov muag pom ? 35 HUAB TAIS pub nej pom tej yam ntawd kom nej paub tias HUAB TAIS yog tus tseem Tswv Ntuj tiag, yeej tsis muaj dua lwm tus tswv ntuj ntxiv. 36 Nyob saum ntuj, nws kheev nej hnov nws lub suab qhuab qhia nej, nyob ntiaj teb, nws pub kom nej pom nws cov hluav taws thiab kom nej hnov nws cov lus nrov hauv hluav taws tuaj. 37 Vim HUAB TAIS hluab nej cov yawg koob thiab lawv cov xeeb ntxwv tom qab, nws thiaj tuaj nrog nej nyob thiab siv nws lub zog loj thau nej tawm Hais Nkws Tos teb los.

38 Nws ntiaj tej haiv neeg loj, thiab muaj zog dua nej kom khiav ntawm nej xub ntiaj mus. Nws ua kom nej txeeb tau lawv lub teb chaws los ua nej lub cuab tam los txog tav no. 39 Hnub no, nej yuav tsum paub, yuav tsum nco ntsoov rau nruab siab tias : HUAB TAIS yog Tswv Ntuj tiag, nws yog Tswv Ntuj nyob saum ntuj thiab nyob ntiaj teb no tib si. Tsis muaj dua lwm tus Tswv Ntuj.

40 Nej yuav khaws Huab Tais txoj cai thiab nws cov lus qhia uas kuv ceeb toom rau nej, kom nej thiab nej cov tub ki tau txoj hmoov zoo, thiab tau nyob ntev niaj ntau xyoo hauv lub teb chaws uas nej tus HUAB TAIS Tswv Ntuj muab pub rau nej nyob mus ib txhis."

Yuav caiv hnub Xas Npas Tos.

5 : 12 - 15.

5 12 "Koj cia hnub Xas Npas Tos ua hnub ntshiab, koj yuav caiv raws li HUAB TAIS, koj tus Tswv Ntuj tau qhia. 13 koj yuav ua hauj lwm rau hnub, koj yuav lis txhua yam dej num kom tas. 14 Tab sis hnub xya, yog koj tus HUAB

TAIS Tswv Ntuj Hnub Xas Npas Tos. Hnub ntawd, koj yuav tsis txob ua ib yam hauj lwm li, koj tsis ua, koj tus tub koj tus ntxhais, koj tus tub txib, thiab ntxhais txib, koj tus nyuj, koj tus lui, thiab tas koj cov tsiaj huv tib si, tus qhua uas tuaj nyob hauv koj tsev, nej sawv daws yuav tsis txob ua ib txoj hauj lwm li. Li no, ces koj tus tub txib thiab tus ntxhais txib thiaj yuav tau so ib yam li koj. 15 Koj yuav nco ntsoov tias koj tau ua luag qhev nyob Hais Nkws Tos teb, tiam sis koj tus HUAB TAIS Tswv Ntuj siv nws txhais tes muaj zog, thiab xyab nws txhais npab mus rub koj tawm los. Vim li ntawd, koj tus HUAB TAIS Tswv Ntuj thiaj qhia koj kom caiv Hnub Xas Npas Tos."

Txoj Cai lub ntsiab yog kev nyiam Tswv Ntuj. 6 : 2 - 13.

6 2 Li ntawd, yog koj niaj hnub hwm HUAB TAIS koj tus Tswv Ntuj, yog koj ua raws li nws tej kev cai lij choj thiab nws cov lus qhia uas kuv hais rau koj hnub no, mas koj yuav ua neej nyob ntev, koj tus tub thiab koj tus tub cov tub kuj yuav ua neej nyob ntev.

3 His Xas Lais, koj mloog mog : Koj yuav ua raws cov lus qhia, kom koj tau nyob kaj siab, thiab huam vam raws li koj cov yawg koob tus HUAB TAIS Tswv Ntuj tau cog lus. Kom koj tau nyob hauv lub teb chaws uas mis nyuj thiab zib ntab ntws lug, lub teb chaws Huab Tais muab rau koj.

4 His Xas Lais, koj mloog mog : HUAB TAIS, peb tus Tswv Ntuj yog tus tseem HUAB TAIS, tsis muaj dua lwm tus tswv ntuj.

5 Koj yuav nyiam HUAB TAIS, koj tus Tswv Ntuj. Koj yuav muab tas koj siab

ntsws, koj tus ntsuj plig thiab koj lub peev
 xwm los nyiam nws. 6 Koj yuav khaws cov lus uas kuv hais rau koj hnub no rau nruab siab. 7 Koj yuav muab cov lus no cog rau hauv koj cov tub ki. Thaum koj nyob hauv tsev, thaum koj taug kev, thaum koj pw, los thaum koj sawv hauv lub lav, koj yuav qhia lawv tsis tseg. 8 Koj yuav muab khi rau koj txhais tes coj xws li ib lub cim, koj yuav muab ntoo saum koj hauv pliaj xws li ib txog phuam. 9 Koj yuav muab sau rau ntawm koj tej ncej tse thiab ncej qhov rooj. 10 Koj tus HUAB TAIS tswv Ntuj yuav coj koj mus txog lub teb chaws uas nws tau cog lus muab rau koj cov yawg koob Has Nplas Has, His Xas Has thiab Yas Kos, thiab cog lus muab rau koj. Koj yuav pom tej lub nroog loj thiab zoo nkauj uas koj tsis tau txhim, 11 pom tej tsev muaj toob xib txhij txhua puv, uas koj tsis tau muab tso rau hauv, tej qhov dej uas koj tsis tau khawb, tej hmab txiv cawv thiab tej txiv ntoo roj uas koj tsis tau cog. Thaum koj tau noj tsau, haus txaus lawm, mas 12 koj yuav ceev faj, tsis txhob hnov qab HUAB TAIS uas tau coj koj tawm Hais Nkws Tos teb, tawm hauv lub teb chaws ua qhev los. 13 Tus koj yuav hwm yog HUAB TAIS koj tus Tswv Ntuj, koj yuav tsob hwb nws tib leeg xwb. Koj yuav tuav txog nws lub npe los cog lus.

**Tswv Ntuj xaiv His Xas Lais vim
 Tswv Ntuj nyiam His Xas Lais.**

7 : 6 - 11.

7 6 Koj yog ib haiv neeg qee rau HUAB TAIS koj tus Tswv Ntuj ; koj yog haiv neeg uas HUAB TAIS, koj tus Tswv Ntuj tau xaiv hauv tas txhua haiv neeg nyob hauv ntiaj teb, los ua nws
 haiv neeg.
 7 Yog HUAB TAIS nyiam nej thiab xaiv nej, tsis yog vim nej coob dua lwm haiv neeg, rau qhov nej tseem yog ib haiv neeg tsawg dua cov. 8 Tab sis, vim HUAB TAIS hlub nej, thiab nws xav ua raws li lo lus uas nws tau cog rau nej cov yawg koob, ces nws thiaj siv nws txhais tes muaj zog rho nej tawm ntawm lub teb chaws ua luag qhev los, thiab npo nej ntawm Fas Las Oos, uas yog tus vaj Hais Nkws Tos lub hwj huam. 9 Li no koj yuav tsum paub tias HUAB TAIS koj tus Tswv Ntuj yog tus tseem Tswv Ntuj tiag, yog tus Tswv Ntuj tsis fav xeeb uas cog lus ruaj, thiab hlub cov neeg nyiam nws, thiab khaws nws cov lus qhia txheej dhau txheej. 10 Tab sis nws muab txim rau cov neeg ntxub nws. Nws ua kom tus neeg ntxub nws tuag tam sid ntawd, nws tsis ncua lub txim. 11 Li ntawd, koj yuav coj cov lus qhia, cov kev cai lij choj uas kuv ceeb toom rau koj hnub no.

Tswv Ntuj sim neeg siab.

8 : 2 - 6.

8 2 Koj nco ntsoov txog txoj kev uas HUAB TAIS koj tus Tswv Ntuj kom koj taug tau plaub caug xyoo nyob hauv teb chaws suab puam. Vim nws xav cob qhia koj kom ua neeg me, nws xav sim koj thiab xav paub koj lub siab kom thoob ; nws xav paub saib koj puas coj nraim nws cov lus qhia los tsis coj.

3 Nws tau cia koj poob ntsej muag, tau cia koj tshaib plab, nws tau muab mov Mas Nas rau koj noj, ib co mov uas koj thiab koj cov yawg koob tsis tau pom dua li. Nws ua li ntawd qhia kom koj paub tias neeg tsis kawg yuav noj mov los yug nws txoj sia xwb, neeg tseem yuav tsum

txais tas puas tsav yam uas tawm ntawm HUAB TAIS lub ncauj los yug nws txoj sia thiab.

4 Plaub caug xyoo ntawd, koj hnay tsis tau ntuag ib ce ris tsho, hos koj ko taw tsis tau o li ! 5 Koj yuav tsum to taub tias HUAB TAIS koj tus Tswv Ntuj tsuas xav cob qhia koj xws li leej txiv cob qhia nws cov me nyuam. 6 Koj yuav khaws HUAB TAIS koj tus Tswv Ntuj cov lus qhia, ces koj thiab taug tau nws txoj kev, thiab koj yuav txawj hwm nws.

Thaum noj qab nyob zoo yuav tsum nco ntsoov Tswv Ntuj.

8 : 11 - 16.

11 Koj yuav ceev faj kom koj tsis txlob hnov qab HUAB TAIS koj tus Tswv Ntuj, tsam koj tsis ua raws nws tej lus qhia, tej kab ke thiab tej kev cai uas kuv ceeb toom rau koj hnub no. 12 Thaum koj tau noj tsau plab, thaum koj txhim tau vaj tse zoo nkauj nyob, 13 thaum koj pom koj cov tsiaj loj tsiaj me huam vam tuaj, koj cov nyiaj cov kub ntau zuj zus, koj lub cuab tam loj zuj zus, 14 mas koj ceev faj kom tej ntawd tsis txlob ua rau koj lub siab muab hlob tuaj mog ! Tsam koj hnov qab HUAB TAIS koj tus Tswv Ntuj uas tau coj koj tawm Hais Nkws Tos teb, tawm hauv lub tsev ua qhev los. 15 Nws yog tus tau coj koj hla lub teb chaws suab puam loj dav thiab muaj chaw ntshai ntau kawg, lub teb chaws uas nab muaj taug, thiab laum kiv tshooj khiav ua ntshua niab, lub teb chaws tuag dej vim yeej tsis muaj dej qhov twg li. Yog Huab Tais ua kom dej txhawv hauv ib phab tsua zeb xob hnay rau koj haus. 16 Yog nws muab cov mov Mas Nas, uas nej cov yawg koob tsis tau pom dua rau koj noj nyob hauv teb chaws suab puam. Nws ua li

ntawd qhia koj kom koj ua neeg me, thiab yog vim nws xav sim koj siab, kom yav tom ntej, koj lub neej zoo.

Lub cim txiav nyob hauv nruab siab. 10 : 12 - 22.

10 12 His Xas Lais, HUAB TAIS koj tus Tswv Ntuj xav kom koj ua dab tsi ? Nws tsuas xav kom koj hwm HUAB TAIS koj tus Tswv Ntuj, kom koj taug nws tej kev, kom koj nyiam nws, kom koj muab tas koj lub siab, koj tus ntsuj plig los tsob hwb HUAB TAIS koj tus Tswv Ntuj, 13 kom koj khaws HUAB TAIS tej lus qhia thiab nws cov kev cai lij choj uas hnub no kuv qhia koj, ces koj yuav tau lub neej kaj siab.

14 Lub ntuj, thiab cuaj txheej ntuj, lub ntiaj teb thiab tas puas tsav yam nyob hauv ntiaj teb, yog koj tus HUAB TAIS Tswv Ntuj tug. 15 Tsis kav Huab Tais tsuas xaiv koj cov yawg koob xwb, vim nws nyiam lawy, thiab hlub lawv. Thaum dua lawv tas lawd, nws tau xaiv nej uas yog lawv cov xeeb ntxwv. Nyob hauv tas txhua haiv neeg, nws tsuas xaiv nej xws li niaj hnub no.

16 Nej ua lub cim txiav daim plhaub qhwv nej lub siab thiab lub xwb qwb, kom tsis txlob txhav ntxiv lawm. 17 Vim HUAB TAIS nej tus Tswv Ntuj yog tus Tswv Ntuj kav tsoom tswv ntuj, tus Huab Tais kav tsoom huab tais. Nws yog tus Tswv Ntuj loj, yog Tus Yeej, thiab Tus Muaj Hwj Xyeej tas nrho. Nws tsis xyeej leej twg, tab sis nws tsis txais leej twg cov paj tshab los xiab nws.

18 Nws ua ncaj rau tus me nyuam ntsuag thiab tus poj ntsuam. Nws hlub tus pej kum neeg, nws pub mov thiab pub ris tsho rau tus pej kum neeg. 19 Nej yuav nyiam cov pej kum neeg, vim nyob Hais

Nkws Tos teb nej kuj yog ib co pej kum neeg thiab.

20 Tus koj yuav hwm thiab yuav tsob hwb yog HUAB TAIS koj tus Tswv Ntuj. Koj yuav npuab nws, koj yuav tuav txog nws lub npe los cog lus. 21 Tus koj yuav cav txog, yog nws, vim nws yog koj tus Tswv Ntuj : nws tau ua tej yam loj tas nrho thiab muaj hwj xyeej kawg rau koj qhov muag pom. 22 Thaum koj cov yawg koob tsiv mus nyob Hais Nkws Tos teb, lawv tsuas muaj xya caum leej xwb. Nyem no, HUAB TAIS koj tus Tswv Ntuj ua kom koj coob npaum li cov hnub qub nyob saum ntuj.

Tus mloog Tswv Ntuj lus nws yog tus yeej. 11 : 22 - 28.

11 22 Yog nej khaws thiab nej ua raws nraim cov lus qhia uas kuv muab rau nej, yog nej nyiam HUAB TAIS nej tus Tswv Ntuj, nej taug nws txoj kev thiab nej npuab nws mus li, 23 mas HUAB TAIS yuav ua kom cov haiv neeg ntawd swb nej, ces nej yuav ntaus yeej tej haiv neeg loj dua nej thiab muaj zog dua nej. 24 Nej lub qab xib taws tsuj qhov twg, mas qhov ntawd yuav los ua nej tug, txij cov teb chaws suab puam mus rau Lis Npaas teb, txij tus niam dej Aws Fas Tes mus rau lub hiav txwv Hnub Poob yuav yog nej teb chaws tas huv si.

25 Tsis muaj leej twg yuav tiv yeej nej. Nej tsuj txog lub teb chaws twg, mas lub teb chaws ntawd yuav ntshai nej, raws nraim li HUAB TAIS tau hais.

26 Saib ! Hnub no kuv tso txoj hmoov zoo thiab txoj hmoov phem rau ntawm nej xub ntiag.

27 Txoj hmoov zoo, yog thaum nej mloog HUAB TAIS nej tus Tswv Ntuj

cov lus qhia uas hnub no, kuv muab rau nej. 28 Txoj hmoov phem yog thaum nej tsis mloog HUAB TAIS nej tus Tswv Ntuj cov lus qhia, yog thaum nej ncaim ntawm txoj kev uas hnub no kuv qhia nej, thiab thaum nej mus tsob hwb lwm cov tswv ntuj uas nej tsis paub.

Tswv Ntuj cov Yaj Saub.

18 : 9 - 20.

18 9 Thaum koj mus txog lub teb chaws uas koj tus HUAB TAIS Tswv Ntuj muab pub rau koj lawd, mas koj tsis txhob xyaum ua tej yam phem tsiv saib, xws li cov haiv neeg nyob txawm teb chaws ntawd. 10 Nyob hauv koj, yuav tsis txhob muaj leej twg muab nws tus tub los tus ntxhais hlawn hauv hluav taws. Yuav tsis txhob muaj leej twg ua saub, xam hnub qub, ua txwv khawv, tso dab, 11 ua khawv koob, tsawv dab ntxoog, nug cov tuag. 12 Tej no yog tej yam phem tsiv saib tshaj rau HUAB TAIS. Vim muaj tej kev phem tsiv saib kawg no nyob hauv cov haiv neeg ntawd, mas HUAB TAIS thiaj rhuav lawv rau ntawm nej xub ntiag.

13 Koj yuav ua neeg zoo txhij zoo txhua rau HUAB TAIS koj tus Tswv Ntuj.

14 Vim cov haiv neeg uas koj yuav yeej, mas lawv mloog cov kws xam hnub qub thiab cov ua saub. Tiam sis koj, mas HUAB TAIS koj tus Tswv Ntuj tsis pub ua li ntawd.

15 Koj tus HUAB TAIS Tswv Ntuj yuav tshoj ib tug neeg hauv nruab nrab nej, hauv koj tsoom kwv tij, kom nws sawv ua Yaj Saub zoo li kuv. Nej yuav mloog nws hais. 16 Qhov ntawd, yog qhov uas koj tau thov ntawm HUAB TAIS koj tus Tswv Ntuj thaum tsoom His Xas Lais ua lub txoos nyob saum roob Hos Les, koj

hais tias :

"Kuv tsis xav hnov HUAB TAIS, kuv tus Tswv Ntuj lub suab ntxiv, kuv tsis xav ntsia lub cub tawg loj loj ntawd ntxiv lawm, tsam kuv tuag."

17 HUAB TAIS thiaj hais rau kuv tias :

"Lawv hais yog lawm. 18 Kuv yuav tsa ib tug Yaj Saub zoo li koj, hauv nruab nrab lawv tsoom kwv tij los. Kuv yuav muab kuv cov lus tso rau hauv nws lub ncauj, ces nws yuav hais tas puas tsav yam rau lawv raws li kuv qhia. 19 Yog leej twg tsis mloog kuv cov lus uas tus Yaj Saub hais, mas kuv yuav nug nws txog qhov ntawd. 20 Yog tus Yaj Saub twg muaj cuab kav tuav txog kuv lub npe hais tej lo lus kuv tsis tau qhia kom hais, los yog nws tuav txog lwm tus tswv ntuj lub npe los hais lus, mas tus Yaj Saub ntawd yuav tuag xwb.

Yuav cev thawj cov qoob loo rau Tswv Ntuj. 26 : 4 - 10.

26 4 Niadj xyoo koj yuav ris ib kawg nplej tshiab tuaj rau tus Leej Choj. Tus Leej Choj yuav txais lub kawm ntawm koj tes mus txa rau hauv HUAB TAIS koj tus Tswv Ntuj lub taw thaj txi Ntuj. 5 Ces koj yuav hais cov lus no rau HUAB TAIS koj tus Tswv Ntuj :
 "Thaum ub, kuv txiv yog ib tug neeg As Las Mais nyob tsis ruaj chaw. Nws nqes mus Hais Nkws Tos teb, nws coj ib pab neeg tsawg mus. Ntev mus lawv coob tuaj ua ib haiv neeg loj thiab muaj zog. 6 Cov Hais Nkws Tos hiam peb thiab tsis saib peb li. Lawv kom peb ua lawv qhev ces peb txom nyem tas nrho. 7 Peb thiaj hu txog HUAB TAIS, peb cov yawg koob tus Tswv Ntuj. HUAB TAIS hnov peb lub suab, thiab ntsia peb txoj kev txom nyem, nws pom peb lub neej raug luag

yuam. 8 HUAB TAIS tsa tes coj peb tawm Hais Nkws Tos teb los. Nws pab peb, nws hem cov Hais Nkws Tos kom lawv ntshai thiab nws ua hwj huam yees ntxwv. 9 Nws coj peb los txog qhov no, nws muab lub teb chaws no rau peb. Teb chaws no muaj mis nyuj thiab zib ntab ntws lug.

10 HUAB TAIS, ntawm no yog thawj phaum qoob uas koj pub rau kuv, mas kuv nqa tuaj cev rau koj."

Koj yuav tso cov qoob ntawd rau ntawm HUAB TAIS koj tus Tswv Ntuj xub ntiag, thiab koj yuav pe HUAB TAIS koj tus Tswv Ntuj.

His Xas Lais yog HUAB TAIS haiv neeg. 26 : 16 - 19.

16 "Hnub no, HUAB TAIS, koj tus Tswv Ntuj ceeb toom rau koj tias koj yuav coj nws tej kev cai lij choj. Koj yuav coj tej kev cai ntawd, koj yuav muab tas koj lub siab lub tswv yim los ua raws li ntawd.

17 Hnub no, koj tau hnov HUAB TAIS hais tias nws yuav ua koj tus Tswv Ntuj, tab sis yuav yog koj taug nws txoj kev, coj nws tej kev cai lij choj, khaws nws cov lus qhia thiab mloog nws lub suab.

18 Hnub no HUAB TAIS hnov koj teb tias koj yuav ua nws haiv neeg, xws li nws tau hais, tiam sis koj yuav tsum coj nws tej lus qhia tas huv tib si.

19 Koj ua li ntawd, mas HUAB TAIS yuav ua kom koj muaj ntsej muag, nto koob meej, muaj hwj chim loj tshaj lwm cov haiv neeg uas nws tsum los.

Koj yog haiv neeg uas HUAB TAIS qee ua nws tug, xws li HUAB TAIS tau hais rau koj.

Tig los mloog Tswv Ntuj lus.
30 : 9 - 20.

30 9 Yog koj mloog HUAB TAIS, koj tus Tswv Ntuj cov lus qhia, yog koj coj nws tej kev cai lij choj ua nyob hauv no, yog koj lub siab lub plawv rov los cuag koj tus HUAB TAIS, mas nws yuav ua kom tas txhua yam koj ua huam vam : koj yuav yug tau tub tau kiv, koj yuav tu tau tsiaj tau txhuv, koj tej qoob loo yuav ntsu. 10 HUAB TAIS yuav zoo siab pom koj ua lub neej kaj siab xws li nws zoo siab rau koj cov yawg koob thaud.

11 Txoj cai uas hnub no kuv qhia koj, tsis yog ib txog cai nrui rau koj, uas koj yuav coj tsis taus. 12 Tsis yog ib txog cai nyob puag qaum ntuj, koj yuav hais tsis tau tias:

"Leej twg yuav sawv peb chaw mus nrhiav txoj cai qaum ntuj los qhia peb, peb thiaj coj tau ?"

13 Kuv txoj cai kuj tsis yog nyob puag ntug hiav txwv sab tim ub, koj yuav hais tsis tau tias :

"Leej twg yuav sawv peb cev mus nrhiav txoj cai sab ntug hiav txwv puag tim ub los qhia peb, peb thiaj coj tau ?"

14 Vim tias lo lus nyob ze koj. Lo lus xeeb txawm rau hauv koj lub ncauj, thiab hauv koj nruab siab. Koj yuav coj tau lo lus ntawd.

15 Koj saib ! Hnub no yog kuv muab kev ua neej thiab kev kaj siab, kev tuag thiab kev puas tsuaj tso ntawm koj xub ntiag. 16 Yog koj mloog HUAB TAIS, koj tus Tswv Ntuj cov lus qhia uas hnub no kuv muab rau koj no, thiab yog koj nyiam HUAB TAIS, koj tus Tswv Ntuj, koj taug nws txoj kev ua neej, thiab koj ua raws nws tej lus qhia, mloog nws txoj cai lij choj, mas koj yuav muaj txoj sia thiab koj yuav huam vam. HUAB TAIS koj tus Tswv Ntuj yuav foom hmoov zoo rau koj hauv lub teb chaws uas koj yuav tau los

ua koj tug. 17 Tab sis yog koj ntxeev siab, koj tsis mloog HUAB TAIS thiab koj cia luag ntxias koj mus nrog luag pe lwm cov dab, 18 mas hnub no kuv hais rau koj : koj yuav tuag xwb, koj yuav tsis tau nyob ntev xyoo hauv lub teb chaws uas nej hla tus dej Yos Las Das mus txeeb los ua nej tug. 19 Hnub no, kuv thov kom lub ntuj lub teb nrog kuv ua tim khawv tias :

kuv cia koj xaiv saib koj xav yuav txoj sia, los txoj kev tuag, lo lus zoo los lo lus phem. Koj xaiv kev ua neej mog ! Koj thiab koj cov xeeb ntxwv thiaj yuav muaj txoj sia nyob. 20 Nej yuav ua neej nyiam HUAB TAIS, nej tus Tswv Ntuj, nej yuav mloog nws lub suab, thiab yuav npuab nws. Vim koj txoj sia yog qhov ntawd, yog qhov uas yuav ua kom koj tau ua neej ntev xyoo hauv lub teb chaws uas HUAB TAIS tau cog lus muab pub rau koj cov yawg koob Has Nplas Has, His Xas Has thiab Yas Kos lawv.

Mais Xes tsa Yos Xuas ua tus coj His Xas Lais. 31 : 1 - 8.

31 1 Mais Xes hais cov lus no rau tas tsoom His Xas Lais :

2 "Hnub no kuv muaj ib puas nees nkaum xyoo lawm. Kuv ncig mus ncig los tsis tau lawm. HUAB TAIS hais rau kuv tias : 'Koj yuav tsis tau hla tus dej Yos Las Das.' 3 Ua li mas yog HUAB TAIS, koj tus Tswv Ntuj yuav ua koj ntej coj koj kev, nws yuav rhuav cov haiv neeg koj yuav mus ntaus, ces koj yuav tau lawv lub teb chaws rau koj yuav. Yos Xuas yog tus yuav mus ua koj ntej coj koj raws li HUAB TAIS tau hais. 4 HUAB TAIS yuav ua rau cov haiv neeg ntawd ib yam li nws tau ua rau ob tug vaj As Mos, Xis Hoos thiab Os, thiab nkawd ob lub

teb chaws. Nws muab lawv rhuav puas tsuaj tas. 5 HUAB TAIS yuav muab lawv rau hauv nej tes ces nej yuav ua rau lawv raws li cov lus qhia uas kuv tau qhia rau nej. 6 Nej ua siab loj tiv lawv, nej txhob ntshai lawv, nej txhob txhawj. Vim HUAB TAIS nrog nej, nws yuav tsis tso nej pov tseg."

7 Ces Mais Xes hu Yos Xuas los. Nws hais rau Yos Xuas nyob ntawm tas tsoom His Xas Lais xub ntiag tias :

"Koj ua siab loj mog ! Koj ua siab tawv qhawv. Koj yuav nrog haiv neeg no mus txog lub teb chaws uas HUAB TAIS tau cog lus rau lawv cov yawg koob tias nws yuav muab rau lawv. Koj yuav coj lawv mus txeeb lub teb chaws ntawd los ua lawv lub. 8 HUAB TAIS yuav ua koj ntej, nws yuav nrog koj nyob, nws yuav tsis tso koj pov tseg, nws yuav tsis ncaim ntawm koj. Koj txhob txhawj, txhob ntshai mog !"

Mais Xes cov hnub kawg.

31 : 22 - 30.

22 Thaum Mais Xes yuav tuag, Mais Xes sau tau ib zaj lus paj huam seev, nws muab los qhia tsoom tub ki His Xas Lais. 23 Mais Xes hais rau Yos Xuas uas yog Nuv tus tub tias:

"Koj yuav ua siab loj siab tawv. Koj yuav coj cov His Xas Lais mus tsuj lub teb chaws uas HUAB TAIS tau cog lus muab rau lawv. HUAB TAIS yuav nrog koj nyob."

24 Thaum Mais Xes sau Txoj Cai rau hauv ntawv tiav tas, 25 nws hais rau cov

Les Vis uas kwv HUAB TAIS lub Xab Cog Lus tias :

26 "Nej txais Phau Ntawv Txoj Cai no, nej coj mus cia ze ntawm HUAB TAIS nej tus Tswv Ntuj lub Xab Cog Lus.

Phau Ntawv no yuav ua tim khawv muab txim rau nej sawv daws. 27 Vim kuv paub nej yog ib co neeg nyiam ntxeev siab, kuv paub nej lub xwb qwb txhav npaum li cas. Nyem no, kuv tseem nrog nej nyob nej twb ntxeev siab rau HUAB TAIS. Dua kuv lawm mas nej haj yam yuav ua phem. 28 Nej mus hu cov txwj laus thiab cov thoob xwm sawv daws tuaj nyob ncig kuv. Kuv hu txog lub ntuj lub teb, kuv yuav qhia kuv cov lus rau lawv. 29 Kuv paub tias dua kuv lawm, mas nej yuav cheem tsis tau nej, ces nej yuav ua phem, nej yuav ncaim ntawm txoj kev kuv qhia kom nej taug : ces yav tom ntej, nej yuav raug kev puas tsuaj, vim nej ua phem rau ntawm HUAB TAIS qhov muag. Nws yuav npau taws rau nej vim tej hauj lwm phem nej ua."

30 Ces Mais Xes hu nws zaj lus paj huam seev rau tas tsoom His Xas Lais mloog.

Mais Xes tuag. 34 : 1 - 12.

34 1 Mais Xes sawv kev ntawm teb chaws quav poj Muas, nws nce mus saum lub roob Nes Npos, mus txog lub ncov roob Pis Nkas uas nyob ncaj Yes Lis Kos. HUAB TAIS muab lub teb chaws huv tib si rau Mais Xes ntsia : txij Nkas Las As teb mus txog ntua rau Daas teb, 2 Nes Tas Lis teb, uas yog Es Fais thiab Mas Nas Xes nkawd lub teb chaws, tas Yus Das teb mus txog lub hiav txwv Xib Fab, 3 lub teb chaws suab puam Nes Zes, lub tiaj Yes Lis Kos uas yog ib lub tsheej muaj kuj yem ntau, mus txog ntua Xos As teb.

4 HUAB TAIS hais rau Mais Xes tias : "Koj ntsia lub teb chaws uas kuv cog lus muab rau Has Nplas Has, His Xas Has thiab Yas Kos raws li cov lus no : 'Kuv yuav muab rau koj tsoom xeeb ntxwv

nyob.' Kuv pub rau koj qhov muag pom, tiam sis koj yuav hla tsis tau mus txog cov teb chaws ntawd."

5 Mais Xes, HUAB TAIS tus tub txib tuag nyob ntawd, nws tuag hauv Muas teb chaws, raws li HUAB TAIS tau txiav.

6 Lawv muab Mais Xes faus rau hauv lub hav ncaj Npes Pas Os, nyob Muas teb. Los txog tav no tsis muaj leej twg paub tias Mais Xes lub ntxa nyob qhov twg.

7 Thaum Mais Xes tuag, nws muaj ib puas nees nkaum xyoo, nws qhov muag tseem pom kev, thiab nws lub zog tseem tsis tau ntaug.

8 Tsoom tub ki His Xas Lais pam Mais Xes tau peb caug hnub nyob hauv teb chaws quav poj Muas, ces lawv thiaj ua lub ntees tuag tiav.

9 Nuv tus tub Yos Xuas lub tswv yim

thoob tsib, vim Mais Xes tau tiag tes rau saum nws. Cov His Xas Lais mloog Yos Xuas lus. Lawv ua raws li HUAB TAIS tau ceeb toom rau Mais Xes.

10 Txij thaum ntawd los txog tav no, tsis muaj ib tug Yaj Saub zoo li Mais Xes, uas sawv hauv His Xas Lais teb los ntxiv. Mais Xes yog tus tau pom HUAB TAIS lub ntsej muag.

11 HUAB TAIS tau txib Mais Xes kom ua tej lub cim thiab tej yam hwj huam yees ntxwv loj tas nrho nyob Hais Nkws Tos teb, tiv tus vaj Fas Las Oos thiab Fas Las Oos cov tub ncig, thiab nws tsoom pej xeem huv tib si.

12 Mais Xes tau muab nws lub hwj huam loj thiab nws lub hwj xyeej txaus ntshai rau tas tsoom His Xas Lais pom.